

甌

甄

洞

藁

瓶甌洞藁卷之四十七

武昌吳國倫著

齊安王同軌校  
新安方尚賢校

哀辭五首

魏母李孺人哀辭有序

維嘉靖甲寅夏六月尚書比部郎魏裳母李孺人卒  
郡人吳國倫同裳舉進士知孺人有士行而悼其不  
逮中壽亡也往哭之然且拭涕弔裳勿過哀毀質也  
已予在告聞裳且病已又聞其病且死忽蘇嗟乎裳  
也哀而傷矣古有之母以子知孺人何以死哉作哀

辭辭曰

嗟展如之人兮此邦之媛毓靈和於樊楚兮胡聖善  
之獨全夫豈獨姱以練要兮又雜佩夫衡蘭纓寶璐  
之陸離兮辨明月以爲環待明哲以結褵兮洵匹休  
於伯鸞申晨婦以作戒兮允賓儀之婉孌奉舅姑以  
樂康兮將魚菽以竭懽執俎豆之苾芬兮覃夙夜而  
惟艱哀時命之屯薄兮痛親闈之長逝寒紆軫而弗  
達兮曾歔歔余鬱邑爰匍匐以襄事兮茹荼苦其何  
釋荃胤嗣之昭質兮嚴渠殲而教之遵前脩而弗替  
兮庶焜燿乎先德策高足於青雲兮食榮名而不溢  
顧三釜以心樂兮芳菲菲其未沫何昊天之不弔兮

乃中道以離愍奄溘疾而客死兮悼宗憲之永折悲  
棘人之號天兮撫綆棺而結惛淚盡而繼以血兮神  
惛潰而屢絕詎吾黨之忉怛兮將行者其心惻脩靈  
洋洋兮何適撫臆思恩兮罔極已焉哉噬指曷忍道  
兮搯臂覩倚廬兮何人顧栝棧兮在室棄榮祿兮焉  
依入泉路兮寂寞述德兮風旂擎涕兮山雨采江蘼  
兮與辟芷薦芬芳兮衆音舉魂之歸兮不可久去幽  
并兮適鄂渚

徐母黃孺人哀辭有序

維嘉靖甲寅夏五月 封孺人徐母黃氏卒于京其

孤給事中綱銜痛辭闕下匍匐擁孺人櫬以歸其鄉  
中書舍人吳國倫故與給事厚善而哀其母客死也  
迺束帛羞酒脯往奠焉舍人曰給事蓋幼孤云孺人  
撫之獨以形影弔也其先文林君積居頗具一二中  
人產暨下世邁族氏豪陰蓄豕心利爲已有謀奪孺  
人志以危其孤狀且具孺人抱孤走郡大夫直之以  
死誓郡大夫見所抱孤輒心異謂孺人曰嫗第亡慮  
兒當高嫗門也小人何自攘之於是豪懼遂寢謀而  
給事有今日嗟乎孺人蒙家難以存孤當是時豈愛  
一死哉茲其節苦矣迺給事業已成孺人志而被榮

名以終不可謂天道無知也微孺人徐氏其微乎爰  
敝辭以哀之辭曰

嗟母氏兮幼志異鑑女圖兮姱節具天不弔兮良人  
逝家不造兮孺何恃羌鬱悵兮百憂至藉襁褓兮矢  
無貳命不渝兮內難弭孤玉立兮紛可喜授遺經兮  
遵懿軌愍弗抒兮福所倚蛟龍驤兮威鳳舉造天衢  
兮際雲雨錫嘉名兮翟蕝美共色養兮鼎食旨歲暖  
暖兮樂且康考令終兮靈洋洋嗟樂樂兮滋永傷擁  
丹旄兮遠彷徨神衆舉兮空北堂悲回風兮襲帷裳  
五音紛兮佩璆鏘蕙肴蒸兮醑枌漿乘玄雲兮歸故

鄉

顧恭人哀辭有序

嗚呼恭人顧大夫良配也爲大夫庀家政甚修而事其姑尤極孝謹廼二子問闕先後舉進士稱兩驥矣語曰不知其母視其子恭人豈不誠聖善哉問方觀察黔中闕爲尚書比部郎時恭人卒於家蓋二子不及含飯是可哀也闕爲予言恭人見白兔過其庭遂病不起嗟乎白兔祥也顧獨爲恭人妖讖耶豈恭人之死生有關象緯耶作哀辭辭曰

傳稱女德處卑執勤動不踰閭寔始儀刑吁嗟恭人

歛茲內美江漢蘋藻亦孔閔矣相爾大夫有容有則  
中饋竭能賓祭不忒上堂愉愉媚我慈姑下堂煦煦  
撫我雙雛伯也鳳舉仲亦偕鳴策足華肆流照儒林  
帝降嘉命翟茀委蛇二賢之母大夫之妻具曰休哉  
恭人樂康德音孔揚受命爾長胡然彌留驚彼白兔  
倏謝總帷遂扃泉戶彼白者兔玉衡之精溫溫恭人  
稟茲曜靈玉衡告殞令儀云亡形必有敝兔奚不祥  
哀哀二子各在一隅含飯罔逮五內若荼瞻望故都  
呼號徂征黔雲屑涕易水吞聲嗚呼哀哉孰豐爾德  
孰嗇爾年曷可問兮悠悠蒼天孰畀爾榮孰奪爾養



曷可叩兮綿綿黃壤惟楚有材母也實培奄其逝矣  
我心則哀何以哀之爲位而哭何以薦之生芻一束

劉處士哀辭有序

維隆慶五年春二月晦日安福處士劉君卒于南粵  
之高州高州守吳國倫醉而哀之初處士從其子司  
理入郡也余視之邸中望見龍眉豐骨脩然有僊風  
焉因勞之曰丈人耄而不杖異矣又能爲萬里遊請  
得以巨壑三山爲丈人壽處士曰徼福子大夫猶善  
飯差強吾兒兒且病至欲以吾餘年棄官去不聞古  
之君子內其祿而外其身乎故從兒遊不知海濱之

遠蓋奪其去志也已予視司理病則司理有感容曰  
家大人春秋高矣獨其意以就養爲快故復與疾從  
之乃今頭岑岑不任藥石徒以憂悸家大人重自不  
孝奈何余退而歎曰劉氏父子相倚爲命其有隱憂  
乎居旬日處士臥病予已趣吏人爲治後事而不令  
司理知也又旬日處士遂不起余旣哀處士就養未  
久客死南荒而又虞司理之不勝喪也稍稍從苦塊  
以禮制之曰此乃公身也盍慎諸司理杖涕而頷余  
言曰孤喻矣第得餘息奉家大人櫬以歸卽日暮填  
溝壑嘉子之賜也今雖相繼殞絕何補於不孝哉嗚

呼處士有子可謂不歿爰屬之辭以告處士之靈曰  
聞公誕生異厥凡匹南極之精蓐龍之裔學知大義  
恥爲常儒惇脩內行孝謹弗渝矯矯自好直項直躬  
貴不折節富不希容秉耒在野婦饁如賓引滿但醉  
塵壻不親亢宗有子一經命之售產購籍畢志弗疑  
子也策名公亦難老慈孝旣洽祿養茲好令狐能教  
毛生善承以喜以懼曷維其寧公何來斯海鶴爲揚  
公何疾斯寢熊爲祥公何適斯大虛與遊公何歸斯  
安成之丘皇天非高后土非深吉人在疚赤日爲陰  
紼謳欲鳴芻靈且駕孰彭孰殤溘焉長夜

封淑人蔡母哀辭有序

代作

維萬曆元年九月十二日 誥封太淑人蔡母嚴卒  
于家訃至貴陽則十月晦也其子中丞公哭過哀予  
旣匍匐慰之不止又三日始能爲位哭予乃陳牲束  
帛奠焉初予按貴陽也蓋中丞公撫綏二年矣一見  
遽謀於予曰家淑人春秋高不克就養邸中不佞竊  
有庭闈之眷無遑寢食子盍爲我圖之會有封疆之  
役疏未及

上訃至矣嗚呼悲哉中丞公其有風木之感乎其  
太淑人業已享上壽膺重封而貴爲大中丞母生榮

死哀曾無遺憾矣爰屬辭以告其靈曰

詩詠壽母史列婦師榮名考終天實祚之南邦之媛  
曷紛其荃胡繩繩寶璐嬋娟殯厥昭族寔始貽穀  
姱節好修介茲百福文祿斯承繡鞶英英瑞光在室  
上應三靈將彼鳳雛于我岐周載振其羽聲聞九州  
煌煌珪組左旄右斧誰其方之文伯吉甫九夷既賓  
蔡侯之勲

帝錫嘉命媿媿淑人象服孔宜鼎脂若飴既壽且康  
卜爾維祺母也噬指蔡侯陟吧日薄崦嵫心之憂矣  
執轡牽輿憂心鬱紆豈不懷歸畏此簡書不弔彼蒼

婺隕其光蘭閨畫局鶴馭宵翔綆棺時結含卽時訣  
號天無從淚盡以血嗚呼悲哉慈顏弗溫修靈若存  
悼言風木徬徨徂奔嗚呼悲哉師憲告殞德音不泯  
風於洋洋締謳斯引

祭文一十七首

祭溫處士文

士無顯晦歸潔廼臧令名壽考易朽其有常猗歟先生  
毓粹衡湘佩茲蘭杜有苾其芳抱彼卞隋恥暴其光  
緬漢陰之機息遵鹿門以徜徉策廣步於霞首亢高  
志而雲翔業彰聘以自老遠朱紱之羊腸顏盈盈而

還童翼矯矯而飛揚豈心之不爲形役廼歷耄耄而  
愈強荃孫謀之旣媿豈祖武其孔彰渥來駒兮歆玉  
鳳將雛兮鳴岡肆 貽恩之行逮兮覃家造之彌昌  
胡鶴馭之靡援兮倏遺榮而告亡將畫終之不可兮  
遂適然以返其常衡之山兮蒼蒼湘之水兮泱泱卓  
生芻兮酌椒漿儼先生兮其來降

祭封一品夫人李母文

何母氏之昭懿兮肇於禹會之鄉萃天姥之靈和兮  
葆婺曜以爲光寒內美之旣具兮而奇服又異乎衆  
芳瞻夫子之幼清兮爰儷美於孟光旣竭懽以將魚

菽兮復祇敬於蒸嘗廼和德之昭盎兮徼冲漠而致  
祥誕中興之良弼兮同申甫之維降顧昭質之媚慧  
兮尤弗替乎義方奄賓儀之中逝兮思蹇產而難量  
解繁飾之陸離兮惟好修以爲常冀家祚之中起兮  
趣國造而齊昌驥盱衡而遠駕兮龍蜿蜒其騰驤炳  
玉燭以照臨兮揭金鏡於無疆荃衮職之罔闕兮咨  
聖善而不揚覃貍恩之三錫兮芬非非其未暮被象  
服曰祁祁兮娛鼎食而色康表憲師於皇邑兮默有  
贊乎陰教極生人之榮樂兮介景福而未央豈及釜  
之爲幸兮視導輿而陋之將招青鸞於海上兮覩白



烏之來翔胡昊天之不弔兮忽朝華之易萎慘沈陰  
之彌留兮遂修夜而不陽卽人壽之標絕兮與流波  
而迅駛歸大素於無何有兮託幽眇而相羊悲棘人  
之樂樂兮號恩斯之罔極追慈顏之不可駐兮增結  
惛而摧腸陟屺而望兮豈乘玄雲而遐舉擁楹而思  
兮將適蒼梧以從乎娥皇叩

帝閭而抒愍兮謝機衡之宥密指於越而駢祖兮歸  
旅櫬而彷徨感

帝衷之悼惻兮俞輟直而從禮議殊卹而厚終兮啓  
石窳以下藏雖泉路之冥冥兮迴九陰之餘照鬯微

音之煜煜兮被金石而靡亡亂曰神炎舉兮茫茫不  
可叩兮蒼蒼霜露淒兮丹旄揚嫵妍息兮總帷張羅  
女樂兮酹椒漿儼修靈兮其來嘗

祭少司空徐公文

赫赫司空顓頊之裔含茲箕曜降乃嶽神朴碩外凝  
符采中鬱結髮弦誦抗志儒玄家難屢嬰經術靡易  
被褐藝圃振羽天逵出理劇邦入遴青瑣異言鹿諫  
正色鵷趨爰奉簡書諮行邊圉圖獻方略允當

上心九列累遷二京孔邁經營罔斁乃晉冬卿五雉  
既脩百揆斯宅

先皇祖落臣庶攀號龍輶方膏公爲清道新宮載啓  
公爲考成抱此 國哀敢辭躬瘁

帝嘉勞績誕降褰綸錄胤賜金寵靈非一胡遭彼口  
遂動歸思遵晦龍山怡情雉水爲儀南國爲憲後來  
山川舍諸 朝野在望庶幾上壽以俟安車豈謂沈  
疴溘焉永逝訃聞遠邇悼罔親疎曰予小人寔奉明  
德省垣後進兒女懿親昔也同朝今則異世撫膺思  
故舉衽含悲芳軌不遐令儀若覩陳詞絮酒公其鑒  
之

祭封御史周公文

嗚呼哀哉蘭有王者之香其瘁也倏焉玉有君子之德其毀也忽焉豈真宰之有奪抑物情之難齊等彭殤乎未達曠今昔而生悲何宛陵之茂士矯蘭玉之殊姿氣英英而薄曜文蜿蜿而銜霓操鴻筆乎骈翬揭龍鼎而委蛇謂驤首於雲陸詎戢翼於冥池已廼播關西之清德表韋孟之一經拭渥洼之符采將丹穴之脩翎戒于公之高戶繕崔史之文林曾五桂之足倭嗤三松之鮮徵肆伯子之奮跡卜家祚之方殷甫弭節于吻海旋簪筆于彤廷方鼎養之未艾徵馳恩之自天胡霜露之易犯奄館舍之遂捐豈朱熊

之是踐抑赤虬之可鞭將齊骨於鄭國從委蛇於漆  
園慨皖簀之既易奉繡斧而虛懸嗟古人之在疚悼  
降割之纏綿叩帝閭而顙哀橫涕泗以南還緬吾屬  
之後生藉伯子以游揚歆象賢之有赫宜世胄之未  
失負國器而未售操大舟而終藏慨九京之難起虞  
二禍之淪亡望丹旄以何之聞隣春之不相咽涇流  
之永逝挽虞淵而疇將彼天道其奚以如之何弔而  
不傷

祭封恭人耿母文

於鑠恭人熒熒婺曜含靈夢渚育粹璇閨動中五音

居閼四教芳蘭爲佩明月爲璫鏡以女圖服之師憲  
弱笄待字昭族委禽相室旣媿賓儀罔斁蒸嘗孔潔  
裘褐斯安刑于五宗式是三楚爰篤家祚昭受帝釐  
介爾繁禎誕茲哲胤規嚴三徙業紹一經丹穴揚翎  
渥洼奮足雲翔千仞電越四都伯氏于征仲亦齊軌  
門內師友學與仕俱六經載明得朋如響天民知覺  
伊誰其先儒術用端譽命赫赫

帝谷敷歷晉爾蘭臺蒼珮入 朝絳騶除道名賢司  
軸善類彈冠矧茲友于起草郎署亢宗華國維楚有  
材業謝二龍文掩雙壁匪膺慈訓曷懋忠猷慶積匪

夷恩隆所自褒章累錫象服攸宜八座聯榮五文獻  
彩鼎脂旣備色養彌敦壽介期願禧綿奕葉天之所  
臨母也無疆陟屺于燕倚閭何所西陵黯黯搯臂應  
心不弔彼蒼胡然降割堂摧燕喜并謝忘憂白鳥廻  
翔青鳥遠逝棘人在疚凶問咄嗟抱杵呼天扶柩搶  
地繩纓管屢柴骨塊容聲徹九原血霏雙衽予脩小  
子忝藉通家匍匐無從相嚮嗚咽墜悲易水眉涕漢  
濱畫宮受芻瞻廬藉藁栳捲尚澤總帳若遺金蠶不  
絲石窀難旦令儀令德曷亡曷存

天子慰勞禮臣議卹直哉彤管賁爾玄臺嗚呼恭人

有子中丞有母矣爰躋二室薄采三花酌酒陳辭神  
兮來格

祭陣亡義兵鍾蘭等文

嗟爾諸靈生負壯節督力邁衆志在國仇頃遇倭奴  
侵境肆毒爾爲敵愾奮不顧身方獻首功橫罹鋒刃  
英風烈烈義聲彌揚爰命道人掩爾僵骸陰氛慘澹  
心誠悼之特揭爾名陳旌旅奠爾名不朽爾魂來歸  
糾糾洋洋爲厲助順將雪爾憤以衛我疆爾靈有知  
庶幾承聽

祭吳川節女林玉愛文



鳴呼汝母子胡弗造於天而離愍凶若茲哉嗚呼汝  
母子胡獨全其天而得死所若茲哉方其聞寇也龍  
母震驚海若怒號虎士棄壘戈船不操汝母子非有  
符召可待也胡不畏而走耶及其被執也比屋一炬  
千夫血刃乞息媮生載塗纍紉汝母子非有羽翼可  
舉也又胡不順而從耶嗚呼陸可沈天可墜非汝闔  
不履血可漂肉可飛非汝宗不歸故罵賊之舌勁於  
天兵抗節之身屹如長城嗚呼爲汝母子蓋烈丈夫  
之所難也豈其挾三山爲底柱而欲挽巨壑以浴扶  
桑耶胡誓之激烈而就之從容若是耶嗚呼抵衛女

之甓汝憤難平龔曹娥之碑汝哀難鳴爰敦我師羣  
醜告俘爰表汝宅揭茲好修斷幣弗續完秉若初逝  
鬼弗返來芳孔都汝母子有靈其少慰耶今遣官陳  
詞而以少年之禮祀汝汝其聽而享之

### 祭李紀善文

西平有子奕世滋蕃喬在高興褒然名閥一經累葉  
龜紫蟬聯君秉靈和修幹挺立才增北學志紉南圖  
佐邑旣閔仁聞休暢毅欲有樹退若不勝吏隱旣甘  
時好弗恤爰在王所曳裾孔閒佩紉湘蘭建尊楚醴  
長揖以往高蹈海濱爲雲爲霧視爾諸仲和珠如玉

維子若孫抗意赤松託棕青桂蕉椰爲釀耳熟但眠  
適我來斯掀髯道故感遇旣戚笑語載頻曾幾何時  
溘焉長逝嗚呼河清可俟漏刻難綿把臂奚辭須臾  
隔世緇帷素屋望之黯然式干表容先民有則嗚呼  
玉樹告萎金蠶不綵太素爲魂太虛爲穴宰木夜拱  
雨露自天君其有知鏡茲玄理

祭蔡母嚴淑人文

恒言無當母以子顯家利女貞國宗師憲鄒有徒舍  
衛聞倚閭仁義忠孝乃承權輿敬姜告殄尼父三歎  
殫母奚爲圖彤大漢蔚彼威雛胎自丹穴匪厥龍媒

曷稱汗血赫赫蔡侯克壯其猷綏是遠國威鬯澤流  
九譯旣共五瑞斯同建橐息馬伊誰之功憲乃文武  
焜煜盟府慈訓若臨蔡侯有母母氏頤頤展如嚴姬  
七誠是鏡四德是依偕此良人閩海之濱祚在中葉  
內難孔殷筑筑拮据靡有定居夙夜荼苦牛衣鹿車  
難是用濟誕生國器倚伏何常兆厥三異一經之遺  
百福維基亢宗華國天寔騭之勞施社稷

帝心以懌爰錫嘉名旌是淑德翟芾煌煌羽葆載揚  
蔡侯燕喜列鼎稱觴是母是子令聞不已胡然愍凶  
訣以萬里多壽多男往哲其艱名孰與耀造孰與完

嗚呼總帷尚溫石窳斯存有卹自天夜臺孔尊嗚呼  
萬形朝露同歸大素修靈洋洋爲娥爲婺國倫瞻棘  
人之在疚悼懿範之莫追采澧蘭與沅芷聊寄愴而  
聲悲

祭莊處士文

嗟乎徵君山澤之癯徜徉歌飲歲月遽遽曾不知冠  
冕之貴於短褐而彭聃之壽於殤子也豈非鴻冥蟬  
蛻之流歟迺今脩焉冲舉歸乎太素鶴馭弗援合神  
若故又安知貴不必冠冕壽不必彭聃乎嗟乎徵君  
不死矣予與徵君之子垂髮定交皓首如一忝籍通

家聞訃街恤一酹芻靈涕泗盈臆徵君豈復有知乎

祭徐公子文

昔我釋褐司空在 朝宜人如京適生公子英骨天  
挺慧靈嶽鍾世德浸延家祚爰篤才與年益聲用實  
彰司空奏勞

天子錄胤覃承嘉命就學成均麗澤羣英翱翔六藝  
探奇石鼓邁跡銅鞮省覲南旋逡巡北顧借爾伯仲  
壽爾嚴慈梓里分華士林蜚耀天胡降割兩違殷憂  
五內旣摧二懷安釋怨干穹昊淚徹重泉積痛成病  
殞生爲殉訃音所至䟽戚悼驚嗚呼哀哉孰榮爾躬

乃齋其嗣孰優爾澤復天其年天道難知宛其已矣  
小子不佞分在通家匪以聯婣始關休戚幽明永隔  
匍匐奚從藉茲蕙穀酌以蘭醑臨風一酹寫我哀衷  
神兮如生鑒此芬苾

祭門人鄭子賢文

維萬曆己卯孟夏七日鄭茂才子賢卒于家友人吳  
國倫傷之因炙雞絮酒而奠焉其辭曰嗟乎子賢已  
矣乎子賢自束髮綴文每試輒高等從吾兒遊數年  
已卽介吾兒以及吾門挹其儀禧禧然端也翊翊然  
敬也姁姁然溫也叩其中閭閭然虛也徐與之言饒

隴然悟也嗟乎子賢豈非載道之器而用世之資乎  
卽吾山居樂與二三子遊尤自喜以爲得子賢晚也  
乃今暮春之月見子賢病起而色不華心竊憂之因  
語之曰盍姑居息以自珍乎又旬日子賢試僇於州  
大夫而文氣日振吾爲之憂益深蓋恐其神力竭也  
未數日果病病六日吾趣往視之越明日遂不起嗟  
乎子賢何負奇之蚤而厭世之速乎豈才竭於文藝  
而數厄於陽九乎嗟乎子賢已矣遺孤在穉少婦在  
室愛弟在疚二老人在堂今入子賢之戶但聞哭聲  
震于地而徹于天子賢不可復招矣可勝慟乎可勝



慟乎

祭劉仲將明府文

昔予與子垂髮齊年抱經同塾聞道誰先予資子敏  
子勵予顓切磋既久符彩相宣入共居息出亦連翩  
肅皇在位郡國徵賢厥歲己酉並薦公車聯轡而北  
射策彤廬予收子落執手踟躕子反舊業下帷若初  
予留京邸日月居諸維辰與參天各一隅以子懷珍  
三獻不剖豈惟行惻寔邁陽九言念老親就茲升斗  
蜀晉魯齊甘焉奔走破觚斲珞與古人友此曰召父  
彼曰杜母年踰始衰有家如旅招以素書爰歸其所

孰膳鴈鷦爲弭諄語孰抱麒麟爲延鬯秬積惋爲鳩  
薰心可炬塊焉臥痾顧瞻無侶入子之室察子之容  
欲言舌結將吁氣忡予知子病匪藥能攻百憂匪石  
填子之胷虛謹若雷塞子之聰雞骨垂朽七發何庸  
屬在彌留瞋目而視啓手啓足但呼汝弟時予在牀  
竊窺其異真性復元真魂將逝曾不須臾溘焉大寐  
蓋棺之辰始卜爾嗣嗟乎仲將仕非不久乃心徒勞  
家非不給所居蓬蒿族姓雖蕃罔沐餘膏交親雖廣  
罔德一毛豈子之嗇惟子之遭暨承凶問罔不哀號  
嗟乎仲將尚憶若翁爲子深憂飲泣而道屬予爲謀

予竟負此子曷自由撫今思昔蒼天悠悠期子白首  
泉石見休宛其中棄孰與綢繆嗟乎仲將子澤幾斬  
有弟則仁卜嗣匪他同氣之親如子英爽其鬼必神  
陰翊爾嗣用綿爾禪傷哉斯悼倍於靈均陳辭醢酒  
涕泗盈巾

祭金汝介別駕文

長樂名堰開自李唐山環水紆鬱彼農桑正嘉之間  
公挺其鄉始綴家學斐然成章經壇藝苑欽爾翱翔  
屢試獲雋名聞三湘制科弗偶負氣昂藏晚登貢籍  
國之光珥筆奏對懷牒爲郎丹轂黃綬佐郡于梁

小心清德奉職維良相時歸政泉石徜徉年躋耆壽  
忻焉樂康旣醉且歌婆娑如狂胡然隔宿不殄而亡  
嗟乎公乎憶予髫歲公一見之忘年與友擊節稱奇  
洎乎婚仕恐負所知已公釋褐遇予京師暨予里居  
公其爲儀室旣伊邇遊不曠期二三長老皓首龐眉  
香山白社何加于茲公獨遄往倏倏何之酡顏如生  
總帳已施筑筑孤息嗷嗷病痿登堂誰主泣然生悲  
東觴絮酒來斯歆斯

祭侯夫人文

維萬曆癸未秋九月侯母朱夫人年九十四卒于裏

陽官廨其子楚按察大夫堯封以冬十月之末旬載  
其櫬浮江而東其子之友河南叅政下雉吳國倫以  
炙雞絮酒迎之富口而爲文祭焉其辭曰人之寄世  
壽夭何常子之承親喜懼交致侯大夫蓋奉其母三  
仕楚矣方夫人年登九十楚人無遠近奔賀之大夫  
蓋喜極而增懼焉乃今楚人無遠近奔弔之大夫蓋  
懼極而增哀焉顧太夫人之貞也而有子如大夫貴  
也而有壽近百歲則晚世所希聞而人子之極幸也  
第國倫伏在大夫宇下而大夫不以凡民遇之有友  
道焉今也夫人捐今而古矣旣鮮升堂之期夫人之

靈且去楚而吳矣益重招魂之感江雲之漠漠望  
丹旄以搖搖酌酒陳辭不勝哀愴惟夫人其陰鑒之

祭汪氏嫂文

嗟予少齒家造中微二尊棄孤與仲相守惟仲與嫂  
視予甚恩仲既有家予亦祿仕嫂氏佐仲厥有成勞  
慈下睦親不侈不嫉爰篤門祚茂樹懿聲年踰六旬  
素鮮真疾胡然溘逝疎戚怖驚仲老疇依孫幼孰恃  
總帷閒寂芻几淒清追舊撫今黯焉傷衷陳牲醴酒  
惟靈鑒之

祭周元亮先生文

維公壺陽上族五世居楚少承家學佩服儒玄蚤錄  
明經翺翔旆苑四方名彥交挹下風膠序羣英造門  
請業三仕爲令所至遺思晉牧雄州滋多異績中歲  
納組高蹈林丘觴詠自娛敦雅卻俗交不面合足不  
漫投與必端人言遵往訓有司尊禮冠冕師模年踰  
八旬起居如壯胡然厭世遽涉殊庭憶予兩家世聯  
婣好厥有季父與公周旋接席同居主盟鄉校予雖  
後進公實忘年出每同遊入從後載誼關休戚歡聲  
生平屬在彌留執手驚怖宛其捐棄五內俱傷風雪  
載塗遊魂焉逝老成凋謝後來疇依賴有子孫克縣

先緒典刑俱在流澤  
凌宋生順死寧鮮厥  
倚匹陳辭  
漬酒公其鑒諸



麤蕪洞藁卷之四十八

武昌吳國倫著

齊安王同執校  
新安方尚賡校

雜文四首

繼本說

國倫將之玄嶽過襄

襄王使其客郊勞焉明日王宴國倫於齊宮饗禮甚  
盛爲之賦鹿鳴國倫避席謝曰放臣而賓薦之不已  
泰乎飲旣卒爵王起授國倫簡曰襄羸國也以我先  
獻王之靈受茲赤社以仁立國世世訓之罔敢有隳  
德暨我王考受命滋益恭母侗好逸乃惠乃順用能

篤於宗親施於有衆庶幾羣臣百姓寔庇蔭膏澤之仁聲洋洋如江如漢升聞於

天子天子錫嘉命焉奉而藏諸寢廟矣及孤之身不敏夙夜謹懼思治屏翰之業以少光王室而逆天休其何德之修修仁乎夫仁立國之本也王考之本仁也孤繼之遂得題諸齋宮以自鏡志不敢惰忽予大夫豈有說乎國倫竊以爲四方修辭之士操觚從王遊如唐勒景差鄒陽枚乘者不少矣王無所問而以問國倫豈國倫知言哉因退而繹繼本之義爲王誦之蓋生生之謂仁繩繩之謂繼本仁者好生者也繼

本者善繼其志者也王見夫荆之長松文梓乎輪囷  
離奇干雲霄蔽日月天下之巨材也其生意之所息  
雨露之所滋蓋不可世歲計矣藉令植本不深灌溉  
不繼安見其不終槁落乎故孔子曰置本不固無務  
豐末其繫升之象亦曰地中生木升君子以順德積  
小以高大知積知固而繼本之義思過半矣古稱積  
功累仁莫如周周封同姓之國而以仁厚傳者莫如  
魯周之旣興也卜年八百而魯之享國亦三十四世  
其所由來遠矣本深末茂夫復何疑今王富於春秋  
寬恭弘雅尊禮賢士志不好異物而好仁行不務廣

意而務本善繼之道誰其克贊之王如不自滿假而懷永圖則有請焉願母以寒勝暴母以終渝初母以小惠當大德升之高大王其有焉卽周公之國與周祚竝長宜不是過豈王之諸臣未有以聞於王者乎王曰善孤知所爲繼矣

爲劉明府立嗣議

士無後而立嗣先王繼絕之遺意也禮爲人後卽稱其所嗣而伯叔其所生不亦重乎乃本朝約法取同宗而罪異姓蓋謹始以明統云漢以來名賢如伏黯諸葛亮戴胄杜正倫皆子兄弟之子爲嗣是於同

宗中又以同氣爲戚非漫然罔擇也況異姓乎仲將  
明府生平鬱鬱不得行其意竟無嗣而死郡人莫不  
哀之蓋棺之日予與其二三執友及諸內外懿親謀  
爲立嗣以主祀事僉以爲然乃屬其內弟盧安盧宗  
盧彥盧音內叔盧本正及其從弟席從姪應龍館甥  
吳國賁楊子瞻熊名世請於盧孺人曰明府第商有  
子四人未知所愛孺人涕泣而答曰夫嘗愛其三郎  
未及立而疾已病今從夫意可耳予曰善蓋三郎於  
昭穆相當尊卑不失序且同氣最親又明府愛也於  
禮與法俱合以問商商曰有諸君在敢不惟命因呼

三郎就靈几前奉明府之意立之遂令服衰扶杖拜  
奠成禮時三郎年甫五歲僉謂明府居恒兄事予屬  
予命名名曰應孝嗟乎應孝立明府庶幾有後矣焉  
用議夫議者蓋激於流俗之薄而欲有所藉以保厥  
終耳吾鄉熊明府之嗣立而弗愛葉明府之嗣立而  
弗終此其監不遠非嗣難而撫嗣難也故不佞創爲  
是議使得告諸家廟矢諸明神曉然示諸宗族鄉黨  
自有茲嗣以後諸舅諸姪諸甥竝當爲明府愛嗣子  
而翼之成立勿使小人有覬心勿使異姓兒有禍心  
以自扞禮法庶其母子安而地下之靈亦安不則踵

熊葉之薄道何以嗣爲謹議

題三官廟疏

郡故無三官廟諸父老之好事者特創爲之而請於  
郡大夫郡大夫曰神依於人亦必以其鄉之人重而  
況無其舉之者乎若其謁吳先生庶幾先生一言則  
三官之靈也而父老之著龜也舉易易耳於是諸父  
老將郡大夫之命來謁予予不能避因叩諸父老曰  
三官何居豈黃冠所誦天地水三官大帝乎曰然曰  
然則三龍女所生三元子爲能得道度世而受封天  
帝者乎曰然曰然則三子生而官天官地官水至神

矣而龍王有女雖靈異亦一水族何以能生三大帝而天地且爲所官乎諸父老矍然失容逡巡不能答予因喻父老曰有之爲學道者設非以倖福也夫羽人三官猶之沙門三寶皆取諸身而寓言之天太陽也地太陰也水則陰之氣陽之精而又能生天生地生萬物者也故人身一天地而水流行營衛間不盈不息而官之者心也心得其官則天地交水火濟萬物生故能長生久視而無恙焉矧人也而神矣稱龍子焉神之也示不可測也稱大帝焉尊之也示不可褻也此三官之所由來也乃黃冠者謂能誦其經



當有天官賜福地官赦罪水官解厄得無塗人耳目  
而使之芻狗其身已乎諸父老曰異哉聞乎吾黨將  
奉先生之言以省心而因奉三官之像以喻衆庶幾  
一鄉之人樂爲善而憚爲不善卽無墮罪厄厚幸矣  
安敢望福乎予曰嚙嘻父老得之矣廟址在州東南  
燕子水口形家者便焉

圓通大士讚有序

圓通大士慧幻人天手目千分指視無念現身南海  
五蘊皆空流教中華一切竝度慈悲之戶旣闢仁壽  
之塗旋開匪獨沙門比丘宗傳其法旨亦有經生學

士頌述其神功超智筏以先登棄經詮而獨覺茲禪  
林所以崇妙極而藝苑因之列上乘今人之禮觀世  
音也良有自矣方伯劉公家世好善自曾大父刻木  
爲大士象龕而事之至方伯七歲時遂有鳴馬警火  
之異居室賴以不燬母太夫人尊信益至從宦中外  
必載與俱晨夕潔除禮拜如見久之太夫人下堂傷  
足扶而後能履者幾一年忽夢神醫如大士狀以藥  
塗太夫人足呼而起之比覺遂能不杖而行日益矯  
捷方伯公始解其憂色曰生我者母庇母者大士因  
述其事志感焉且屬吳子爲之讚佛不云乎出家不

脩善根不如在家在家能脩善根亦勝出家劉氏母  
子蓋以慈孝爲善根而大士之陰助之也非偶然矣  
讚曰大士何常出世觀世興大悲心作無量福形超  
九劫寂照萬緣辟毒持危捷若桴響哉劉氏四世  
積因火失不災足折更履靈局旦啓苦海宵航問何  
功行曰慈與孝南嶽七十二峯十洞十五巖脩行第  
子吳國倫謹讚

像讚四首

顧子承先生像贊有序

先生少發制科出入持風紀惇行古道所至見德乃

其志不患仕不顯而患學不明毅然退處漢濱靜悟  
名理而尤側身脩行取託空言與其弟子良自相師  
友砥礪脩大業故雖弓旌在門堅臥不出匪徒高鑒  
坏之節庶幾還抱甕之風於是士無遐邇風動景從  
擔囊執經屢常盈戶卽國倫未嘗知學每見先生溫  
溫翼翼言日益慎行日益恭與海內之涉蹊徑飾枝  
葉以藉資賈重而不必其身有者殆霄壤懸矣今且  
行年七十好學不衰真不知其老之將至蓋嘗心師  
之而媿不能學也昔者恭士机汜行年七十而行必  
隨坐必危魯君曰机子長矣不可釋恭乎汜曰若汜

所謂幸者也何釋恭焉成回行年七十常恐行節之  
虧猶曰回是以恭敬待大命子路稽首曰君子哉由  
兩賢恭敬不已之心以求所謂不知老之將至可知  
先生之學進於是而猶不止於是矣適予操舟涉江  
造先生而問學遇其館甥劉生殷祖使人圖先生像  
示予因索予贊以爲先生壽予覽之儼然先生臨也  
遂整衣避席起曰何溫溫翼翼如是非所謂德容耶  
乃若先生恭敬不已之心卽君家長康無所用其工  
妙劉生其母以形求先生哉贊曰

骨相何癯性真則腴溫溫翼翼淵冰恐逾擇地而蹈

見善則趨褰裳濂洛濯纓泗洙禔衡萬象冠冕諸儒  
渺焉頽仰今古須臾榮華軒綬樂豈笙竿中采微尚  
塊焉安居踐形維肖曷忝扶輿

貞吉宗侯像贊

哲哉帝裔若麟若龍冥心聖則振羽辭宗東平齊軌  
中壘同風昔在南浦方舟之中惠而顧我溫溫其恭  
攜以十稔寤寐將通丹青者誰貌爾德容睨而視之  
宛其初逢氣陵逸駿目送飛鴻如有所思忽焉往從  
冠蓋之邸林壑之蹤貴不及政憂罔效忠耿耿微尚  
繪難爲工

張幼干像贊

噫嘻高山懸水長松拂雲茲何境也乃有獨行君子  
相羊其間白晢脩髯高視緩步骨不必翟而貴踰侯  
指不必陶而重踰公沾沾乎欲有所吐而未伸僂僂  
乎欲有所逃而未往豈非寄情濠濮之上而抗志圖  
史之林者乎何其似吾友張幼干也

延平奚大夫像贊有序

嘉靖壬戌十一月奚大夫攝莆中事而死其難君子  
哀之初賊之圍莆中也先以僞兵入大夫心知其僞  
將執之以伐賊謀乃憲大臣卒爲僞兵所紿城遂陷

憲大臣亦縋城走得不死奚大夫死之日無有  
知者又失其屍所在卽莆人多謂奚大夫或不死賊  
手延平太守周公曰豈有奚大夫不死莆難哉乃使  
人大索三月得大夫屍於民舍中雖膚受三刃而顏  
面肌色如生時延平公又使繪事者貌其像爲位哭  
甚哀諸父老子弟觀者亦莫不哀奚大夫如生也後  
莆人又稍稍言奚大夫欲執僞兵之事延平公泣曰  
我固知奚大夫與城俱亡於是以奚大夫像屬國倫  
且告之故曰子能靳一言使此大夫泯泯乎嗟乎悲  
哉莆中不守非大夫罪然大夫亦可以死矣不則縋



城走耳蒲之子遺謂大夫何大夫楚人又與予善故  
涕泣而讚之曰戕戕爾冠烝烝爾儀爾命非正爾顏  
則怡嗚呼噤嘻豈得死所耶

告文五首

救火得雨告謝城隍文

是歲秋七月丙辰邵武東門火偵者曰人火之也太  
守吳國倫曰惟予司牧失政獲罪于天天實火之竊  
又聞公孫僑禳火於四鄰劉昆氏反風於江陵庶幾  
徼福于神謔于天以急若噍類廼匍匐謁神祠而叩  
之曰今者天不弔牧及予有衆夫茲衆也明則牧治

之幽則神相之高城深池匪衆焉奠禦災捍患匪神  
焉依神其憫之庶幾一雨舉衆於燼牧伏其辜玄冥  
回祿惟神所之鬱攸蒙茸惟神是聽已復將衆趨火  
所徹小屋塗大屋綆缶既竭畚揭告病焦頭爛額者  
數千人踰時而火不滅國倫復仰天而叩曰天災未  
已社將爲墟憂心如薰神其謂何語未卒冠雲滃興  
澍雨驟集殺彼烈焰解萬室憂國倫乃益惴惴焉循  
墻而退避堂以居敬命祝史而告之曰火天災也牧  
失政也故災以示警雨天澤也衆無辜也故澤以示  
仁夫以警始而仁厥終天道其可畏也已敢不省圖

與其攘神力以自勞乎牲既肥潔醴亦芬芳率我旌  
倪嗽詞告謝

倭寇將逼高州告城隍文

社稷人民惟牧是主安危禍福匪神焉依頃茲島夷  
深入我境先賴神力首剉其鋒翼黨重來人情震恐  
牧誠失職神必恫之謹戒官僚謀及父老省愆滌垢  
冀鑒於天惟神聰明應人如響閔民悅帝幽贊默成  
洞啓予愚奠安予土百靈助順殄戾潛銷惟民衽席  
無虞神亦血食不朽其有奸人構釁墨吏行私先所  
暴揚以警衆志式用菲儀用申虔告

倭寇敗遁告謝城隍文

惟神依人惟民依牧幽明匪隔靈爽爲昭不逞倭夷  
操戈內向擾我疆圉神人憤之高城深池藩茲衆庶  
衆庶凜凜牧職其憂徼福于神克壯我旅長蛇封豕  
莫敢予撓飛梯縣樓莫敢予適俘馘既獻士女載綏  
豈曰能勞厥有冥助金湯孔固血食無疆潔醴陳牲  
恭申告謝惟神默鑒俾無後艱

自大梁罷歸告家廟文

國倫叨承慶澤遙迹朝紳歟歷經營二十八載  
馳恩旣錫祿賜寔優頃職旬宣于彼中土孤忠彌瀝

弗避諸艱乃以徼福踰涯直躬忤俗致遭積毀解組  
縣車止足良安怨尤俱泯但貽慙先德自負明時閉  
閣省尤循墻知懼惟是松楸孔邇俎豆時親長謝迷  
途永言思孝庶幾夙夜補厥前愆冀我先靈特垂鑒  
宥

爲曾祖考墓立石告文

昔我府君卜田茲里中祚式微廢于冢子產旣易姓  
隴亦就荒樵虜牧豎乘之徜徉筑筑仲季服儒食藝  
歲一省瞻含哀雪涕百年于茲望之離離藐爾孫子  
怛焉心悲謀及宗老籲諸穹昊贖復故墟用圖永保

爰題片碣表茲幽宅匪封匪樹若堂若闕皇皇脩靈  
千祀其寧振我來裔世守一經

題跋十首

題董生圖書冊

龍圖龜書文明天造厥後則寶鼎石鼓金簡玉簡之  
文以逮八體六書類皆山川藏氣發於異人鴻筆之  
士始得稽采謄錄剡飾符章昭大信以傳無窮及夫  
鼎甲鉅卿神明世冒銘功紀氏奏記陳篇山漢以來  
名家代作今學士家圖書其近之矣四明董生少年  
學書好古尤好作小篆圖握筆操刀心手相應都人

士珍購之生益沾沾自喜乃挾冊謁予索題其端予故不辨書法得生所爲圖玩之好古之意躍然一興矣東漢荀卿氏且老謂其子曰吾綈帙中有先世所傳秘記嘗爲漢用子其脩之嚙嚙董生得無意爲世用其尚慎所傳哉生名鳳元字體仁

### 文姬出塞圖跋

文姬出塞圖作自宋人然世多贋本非具目不能辨往從吳中好事者聞真本在予故人張羽王所南海黎惟敬氏嘗鑒識之予艷慕十餘年不及一覩每以爲恨今羽王來佐郡始得藉觀焉恣我神賞知其爲

宋練不疑矣嗟乎此漢慧婦失意事宋人乃以得意丹青之庶幾與明妃烏孫公主同不泯滅羽王之藏之也有深感哉

題宣和墨妙卷後

此卷爲白門楊伯海所藏予故不善書尤未睹所謂瘦金體乃其紀夢事大奇而筆法遒勁不俗又其中數字如出先大夫手故一見而珍愛之伯海遂以見遺自謂明珠投大賈也嗟乎予豈真大賈哉姑襲之以待賞識者

書張家母節孝卷後



余觀周司業所爲張家母小傳蓋傷哉其言之也夫  
不貳其夫稱節焉而又爲夫不遺其親稱孝焉蓋士  
人之所難而母兼之庶幾婦質而士行其天性矣至  
以良知之學贊之宜不必然晚近世口耳良知而躬  
行妾婦者比比而是又何敢望張家母一節乎

書張幼于惠山泉贊後

世品惠山泉味次中冷頃余遊兩山兼嘗之不必然  
也幼于獨有此贊而元美遂表惠山爲第一大是余  
意余恨不能家惠山安得唐僧爲通泉脉入楚與兩  
君子分甘哉

書幼于十箴後

幼于十箴蓋身之也庶幾韋弦之義而比于臨淄水以自鏡乎子輿氏曰養心莫善於寡慾一言蔽之矣而復加箴其九得無防慾之入由外心乎誰謂幼于文人也

題羅伯符書封賢無閭山銘後

往予在人梁元美中丞爲先大夫作碑成而難善書碑者會關中馬相國以其客羅生伯符來屬予曰是其書法有顏平原之風予因延禮爲書先大夫碑蓋運意結體無一不平原法也已生又袖一帙示予則

其所書梁司馬封醫無閭山銘予讀而壯之銘勅李將軍討虜功而頌上威德誠壯而生得以儒衣手如椽之筆從之塞外磨崖書此銘嚴重如堅壘遒勁如選鋒森朗如列戟橫戈庶幾內鬯神武而外褫虜魄茲不增壯哉諸墨卿見以爲三絕而厚爲生幸謂當與茲山不磨乃予於先大夫碑則自幸亦厚矣時予別生已數歲生復攜以入山見訪乃得重覩而欣賞之爲識數語其後

方仲美遊梁賦跋

仲美故稱詩遊四方而獨以遊梁名賦蓋慕司馬長

卿之爲人而自見其志也予覽其辭工雅近古以爲可傳而仲美益用自喜因屬所善程孟孺書之夫賦古詩之流也仲美賦誠近古而孟孺書法又足爲賦重其傳奚疑

跋王三公卷後

王三公好施不倦與其子自寶善繼之王氏樹德厚矣諸墨人或以其孫季問舉明經仕今爲天報之福或謂季問仕止百里長歸無一日之儲報又何嗇也而獨元美司寇與胤昌太史不謂然昔人有言有所施而人知之是陽德非陰德也夫樹德者不欲人知

寧望報卽季問棄一令如遺而依其母飯僧事佛此其志殆與清畏人知者同也又安計夫報之豐嗇乎元美謂福善爲偶然胤昌以廉吏爲厚報庶幾其明於天之道乎

再書封醫無閭山銘後

予東遊過吳門遇門人羅伯符氏再出此卷則諸名公題識盈軸矣細閱卷字愈有神情因憶爾雅有云東南之美有醫無閭之珣玕琪焉予恨不及望見茲山而羅生書法益以諸題識重何異得珣玕琪爲世共寶乎

龍龕洞藁卷之四十八終

甌甌洞藁卷之四十九

武昌吳國倫著

齊安王同軌校  
新安方尚贊校

書三十九首

奉明府二叔書

違曠省侍條經歲矣日眷眷南鴻弗至何可勝情言  
念大人生產不充酤直郡大夫歲時一無白衣之遺  
小阮微祿尚未能分又大人晚節愈堅恥爲監河貸  
粟此其窮豈可及哉昔鬪文子舍令尹卽無一日之  
儲龐德公隱居不入城府人至於今賢之大人動由  
古道姪不敏不敢穢素風矣旅中貧病無聊南北論

兵未已長安車馬得無爲處堂燕乎憤世憂生間託  
毫素卽何敢擬於風人差欲同街巷語耳此意稍癖  
世味漸輕卽有移目無所用避惟大人有以督教之

復劉子成僉憲書

自客歲道路相左又一年餘卻憶疇昔語笑藐然山  
河矣足下謂聚散有數然哉舊贈言一卷附徐給舍  
以往今達記室否近見督府疏知足下平定首功  
朝廷敘典先及之足下名益自此重幸更強飲食鎮  
靜南服使三軍耒耜異域衣冠卽萬里銅柱無能與  
足下論不朽也僕瑣瑣如故頃屬南北構患羽檄紛



馳時事可憂什伯往昔生平扼腕卒卒未能借一籌  
伐檀之刺豈不羞足下乎匆匆復使者不盡不盡

再復劉子成書

答貺纔數日而手札繼至卽故人加餐之思不遠萬  
里廼風霜屢及各在畏途其於夷猶一室猶恨不數  
數也今昔相迴能無悵然惠教諸篇大自俊逸倚醉  
讀之神游銅柱矣足下方銳情三苗猶及肆意揮灑  
遂與山川爭勝豈不稱壯志哉舒丈人老而無子惟  
足下厚視瓜葛藉以眠食須臾不則間左豪且難肋  
之至於立嗣一節慮無可託是矣饑附飽屬僕亦逆

知其狀然不猶愈於無所歸乎足下其尚力贊之烏  
夷入犯留都奚啻臣辱東南事不知所終僕言官又  
與聞軍旅足下得無謂我食粟而已哉媿死媿死

報李于鱗書

自初夏往一書又數月寂無音驛卽宗王兩生時時  
攜宵甫醉我何能一日不志足下也間會諸部使率  
謂邢大夫亡他獨公檄往來多飾左馬語不近人情  
耳廼僕竊不欲終聽彼所爲閉目而分黑白掩耳而  
別雅鄭足下又何難焉僕自移官以來益虞非據目  
攝諸鬼魅憤不欲生然鮮濟也三寸舌尚在足下豈

卽尸素我耶不則反其牛羊耳元美倚醉數言宇宙  
內不宜有子鱗此其意豈嫌於竝立者子相近益賈  
勇其所退舍二子耳至欲以鴻溝界我何者爲我金  
柅哉聞子與八月已發蒼溪度早晚可到計其時足  
下當入計來茲會大奇卽恐造物不易任耳

答王元美書

僕方稅駕出神武會長鬣之士持一紙來授我讀之  
神實氣結淚不能下天日黯慘僕夫踟躇僕得載此  
詩往雖三黜奚難焉昨子相一病甚潰二日稍蘇子  
與之子九死一生國倫遂不得與二生執手而別則

信乎山河在只尺須臾爲異代也吾黨此別又安知  
非永訣乎不忍道不忍道足下又念吾貧厚有所餉  
有鮑子在豈復覲顏於人第不負二三子雖立稿可  
耳適尊公遣使贐我授我繻行次併謝足下

復王元美書

嗟乎元美之念國倫復何所不至哉使者不遠數千  
里求國倫於空谷尺素殷勤長歌激烈讀之悲喜湊  
至氣盡復增同臭知心孰敦於是夫國倫徒以楊墨  
故自今見放夫復何言移之匡山頗極陳力何側目  
者之心難厭也豈必禦魑魅而後已耶得報西歸遂

欲謝絕人間事擔簦結襪爲五嶽之遊顧以十口嗷  
嗷四壁蕭瑟未能棄而不問計乘秋東走岱宗就于  
鱗元美一卜其居廼書至于鱗欲進之元美欲退之  
是何二大夫使國倫觸藩也吳門千畝韭可其便當  
攜妻子以從不則鴟皮魚腹之間耳夫鴟皮魚腹豈  
元美所忍於國倫哉元美其圖之矣樂府十章出入  
漢魏燕歌行方駕曹氏無疑助甫爲誰得足下贈言  
八章豈其人丈夫哉久不讀于鱗諸體今復更異然  
二子詩欲傳非吳生評之不可幸竢我梁父之陰

復李于鱗書

白于鱗入陝以西遂絕嗣音心想爲病已聞拂衣歸  
歷下心甚高之從元美絨中得所爲四懷詩知于鱗  
未嘗一日遺國倫也使者的投尺素山中友誼良篤跳  
梁行壯哉國倫奚爲不三黜也卽湘纍有靈可復作  
矣獨怪天門日觀其容幾何廼使二大夫飛揚其間  
日詣人所不到之境雄視千古如是哉幸告山靈楚  
狂且至矣所寄一卷手不能釋五子篇遂鴈行國倫  
國倫何敢不自愛待調北行計尚猶豫非就二大夫  
不決也答詩四章舊作一帙先附使者入覽諸侯面  
陳不宣

與宗子相書

潞河發棹七日始抵直沽行路之難茲其槩矣京華風雨不辨金莖抱疾孤蓬遂不敢北望業徐郎已出不知何貴之門可以遊子相子相之念逐客寧有所不至哉徐郎使槎竟亦相後吾黨一二聚首造物尚忌之昔者促膝縱橫不雁重譴倖也僕南矣子相尚善自愛無復爲人移目哉

復宗子相書

別後致足下四書迺今割不一字及得無爲石頭浮沈耶前王將軍人回云足下方擁朱輪從御史行部

所欲轉致皆肝膈也奈何未遽達耶謫所漸習吏事  
苦不能工足下謂國倫意氣安在而今逡巡簿書爲  
也推案有間輒又操翰睨視匡廬諸峯頗不多遜乃  
不得二三兄弟聚呼而賞之爲念殷矣嗟乎建安七  
子開元八仙以爲千古一事吾輩達節肖似而同心  
之義過之廼今五嶽殊方渺不相及豈徒足下念予  
流落哉元美提兵海岱藉有嘉譽于鱗乞歸耕歷山  
不食言矣山婦無恙豚兒已能問客覓果足下晏坐  
署邸頗無他侵兩嫂尚未抱子乎

復樹德宗侯書



國倫既從南浦與君侯別歸而伏枕山樊門可羅雀  
譬則再棄之婦執斧不過其間三北之軍持戟羞與  
爲伍君侯魄問奚自來哉非有古心此義替矣省會  
來諭如起膏肓而惓惓不肖出處似謂國倫好自潔  
而汚世也夫展禽不去曼倩陸沈古人已然予復何  
愛獨以褊心未破新態難工舉足虞羅出門鳥道以  
信步之足而履不測之險難乎其能免矣君侯獨不  
見東吳之子以才而及其親乎不然妻子啼號忍而  
不顧已非人情況食祿十年未效鉛刀一割如素志  
何如君恩何戒裝遲遲良有以也君侯心知國倫

顧獨不及此耶草草答貺惟君侯不吝有嗣音

復用晦書

僕羈旅豫章遘我良友陳詩擊節千古一時風昔薊  
門雅音盛集須臾召忌渺焉參辰今旣陸沈猶逢下  
石佳期不偶物理固有然也回憶舊遊同茲哽咽此  
南浦離歌哀於易水豐城劍氣委乎延津故人明哲  
復何言哉還山以來十日九病遂欲寄情霞外棲志  
蓬蒿謂桐江之風不足希而漢陰之跡無所用抗也  
廼以家徒四壁十口嗷嗷旣無附郭之資復鮮監河  
之貸兄弟朋友見其若此時載酒殺相過勸駕又近

得北來異聞日夜病悸不已使指南之具所嚮皆迷  
觸藩之身進退維谷杜門思過但恐有負故人耳嗟  
乎故人尚念我哉使者出疆授書空谷牘不盈尺情  
溢江河長跼讀之悲喜交至誦諸作尤見鼓行此境  
旣臻他何足羨少自韜晦以永令名固所望也邇者  
新構草堂日與雜作爲伍鉛槧久廢答述不工幸惠  
亮

復張子培員外書

三月還自匡山連得足下書甚慰饑渴僕不肖計別  
足下五年竟無一得徒以骯髒迂世罪至無所逃卽

在南州東帶操手板大斲其性而迂從吏道然於物  
情猶未厭也迺欲僕復作何狀耶明哲之訓業既乖  
違獨恃此心灰木已久頗不爲所厄足下猶哀憐之  
乎所示諸篇不獨藻麗絕羣而寄意寥廓委蛻風塵  
大見冥識豈亦楚之山川於足下有小補耶種種積  
懷吐露無自聞使車入夏當避暑武昌遂可圖良晤  
但勞足下一使先入山中爲期耳詩二章聊以答祝  
報張叔大司業書

國倫以被譴出而又不能補過貽嗤士林負辱桑梓  
甚矣昨謁選復入辱閣下憐而急之似謂下堂之婦

未必自污棄壘之軍尚堪使戰遂令疑網暫撤迷穀  
在躬益堅嚮往之心不以連遭易慮茲所謂道言良  
於拱壁而明規耀於燭龍也南來入宋忽忽歲餘瞻  
伐木之遺墟弔絕糧之故跡茹荼爲旨寢棘良安蓋  
旣小諳於自反之義故怨尤不萌卽折節道塗無非  
典學委身簿領亦可效忠若山鬼寓憤於幽篁而波  
臣乞沐於斗水情雖內迫如時命何況平生鮮所建  
明一遇摧折方寸爲亂儒者恥之茲國論所願請事  
於閣下惟閣下不吝有以命之也久失起居日夜悚  
息延佇天北雲物含情所遺諸篇時時展誦不減余

石之音室邇人遐此足差慰

報元美書

數月失起居然無一日不東面哽咽聞老師小葬足下兄弟晝夜哀號不去左右嗟乎自君門無幸於天使足下兄弟有文名今又不幸有死孝名益可悲痛國倫每一念至腸不能廻至聞人談及則又黯然失色愴愴無以語也奈何奈何僕去家且二年兩稚竟未隨任此中勉脩薄職士人不甚以爲懟而被薦次凡六七其仍株困不移者得無復欲雞肋我耶倘猶不遽削籍則明春當以報政行卽得馳封先二人老

死丘壑無恨矣太夫人尊候近復如何二兄善慰之  
無以毀質傷其心也亟欲相嚮一哭執且無由悵念  
悵念

報趙汝脩書

僕與足下膠漆蓋自束髮然矣以僕有一日之遭而  
足下久未脫穎每念輒爲歎惋蓋穎燕石見寶而美  
玉不售也廼出處異塗而僕之吐赤於足下者無異  
分席時卽僕生平所爲無可語人未有不可與足下  
語也顧足下中稍疑僕僕不知所謂嘗奮袂而歎曰  
以僕不見信於知己又安所望理於世人乎此卽可

以觀命矣郊西別語衆中不盡有懷眷眷南北倉皇  
比至調所日役於外未及溫席在汴中得尺書讀之  
知足下未盡棄僕而有以鞭策之也答貺遲遲不勝  
悚赧所致祝於足下者曲意承親以永終譽至於蝸  
角鼠腸不足爲足下介也

報魯朝選書

日者使翰再至卽已握讀所示洛書大義一過計細  
玩以復旋病矣數日小閒玩不去手足下默契之學  
非僕所窺乃此篇論辯旣明而詞復渾雅有裨聖經  
不淺遂可以傳河圖大極先後天四圖旣有獨見亦



當並傳顧宜小約其詞與洛書成一家言耳乃云斯  
言旨矣未獲我心夫足下之心非謂不直則道不見  
乎然直者直明其道如是非謂搖脣鼓舌與人敵談  
鋒也僕亦云志在明道足矣而渾簡二義正古人修  
詞大法故徇耳目而習故智非善也激異同而露圭  
角亦非善之善也僕豈欲足下不明辯之安在其立  
言哉今足下用僕之言而渾雅其文矣又謂未獲我  
心何謂命之矣命之矣篇中僭易一二字更望裁定  
併足四圖成書僕二三日後當過睢詣齋中面請教  
益而後別也力疾先此

報趙王書

國倫未遊於王而王之客則有以王之高義告國倫者國倫是以益願有請於王而擔簦曳裾計未有當也今王先使使問國倫於汴水之上豈亦王之客有以國倫誤聞於王者乎夫王卑身下士有擁篲設醴之風海內士自操一技以上無不欲藉王以揚聲者國倫知名最後微惠則先洵矣王之義甚高而國倫小人也謝榛膏肓近體鄭若庸墨守六朝兩生今老於王所矣豈復有裨於王然皆有所託而傳焉卽不及鄒枚司馬其人亦可以不朽國倫舊嘗識兩生而

王書及之故敢復問雙筆文簞品極精美王者之賜  
敢不拜命謹對使稽首以謝惟王察之徐常有以報  
王也

報宗先生書

往國倫造次遇使者於彭蠡湖上一醉而別嗣卽夢  
寐求之耳庚申之春僕方入京待調會子相訃適至  
爲之神竇內潰起臥失常食不下咽者數十日嗟乎  
天乎詞人陽九夫復何言譬則同羣之鳥塌翼分棲  
側目呼儔其音哀矣乃虞羅密布天復助其機而中  
之不已異乎又數子中僕於子相意更相屬業已約

爲婚姻曾幾何時遂成今古能不動心木石哉僕今  
羈旅宋中不能遽走哭東望淮海涕泗淫淫且予相  
素自豪且健飲食無疾胡然棄我豈真陸嫂失善視  
耶然亦命矣櫬歸厝何所身後曾擇嗣否願聞其詳  
昨見詩文已刊布必傳無疑第其中小有可芟且傳  
之太速而語多觸時忌非宜也可急索原藁發爲一  
選庶幾死者之心安耳如何傳聞先生哀毀幾失明  
理所宜有然過矣河清難俟萬有歸無尚幸節情強  
飯以需餘年卽死者有知願也茲特遣人持四詩哭  
于子相之靈脫劒束芻早晚圖之矣濡毫氣結語不

復文惟先生亮察

與宗子培書

僕未交子培然從子相知子培深矣子培明經博藝  
江南北蓋罕其儔久而不發豈天欲愈厚其積耶子  
相生嘗以兄事僕今猶不得就子培鴈行欲令僕不  
懷子培豈人情也去夏在京邸方與王元美作南冠  
對泣而蔡人張助甫以子相訃來天日蒼皇五內盡  
裂嗟乎吾黨數子豈獨衆人側目而天亦甘心焉僕  
尚偃仰世途真不知命矣遣使持四詩先代一哭諸  
備尊君緘中見區區也

報座主喬先生書

自都下再候清塵造次南北遂十餘年矣缺焉起居  
食息耿耿國倫蓋以不率名教被罪南浮託迹江湖  
覲顏餬口然視在國之日憂懼小分大抵鼠腹易充  
鳬脰難續且性拙諧世才不逮人時命固然雖士伍  
城旦甘之矣況猶一官不絕如綫耶所爲深自愧心  
者不能以國士報先生耳先生高蹈已久海內想望  
竊憶乙卯之變三秦爲壑顧獨門下生徒僕御晏然  
無恙此豈非天祐者碩以需河再清耶適次柘城握  
管文學之手而問之始悉矯健如故日課兩公子經

術掩開謝客無復人間之營國倫慰心爲甚雖然國  
倫嘗侍先生矣每及時事輒憂見顏色不已今屢薦  
未出豈置天下度外耶抑有所俟也出處大義非小  
子所敢仰窺願竊有請

報麻登之僉憲書

興國去大江六十里而境土稍僻又界江西之寧瑞  
二邑間寧瑞故盜藪而大姓數家尤橫興民甚患苦  
之蓋自設江防以來盜風少息者十餘年興民粗安  
矣近者江防公經數年不一按視以致人心玩愒保  
障廢弛僕頃年里居見羣賊分道入市而有司者未

嘗問也又一日焚掠近郭三十餘家而有司者匿不以聞於當道今弟去家且二年聞有司益相習以求盜爲諱而市井之民夜不解衣臥又聞盜俠數輩盤據公門爲內外應三農不得秉耒耜矣嗟乎前患寧瑞盜今興民且自相盜遇寧瑞盜至又引而助之矣何也蓋盜無所懲而有近利民無所恃而多肘腋憂故民而不盜者無幾也又去年大潦無秋今春積雪爽候粒食旣匱死犢盈野而鄉之巨猾且藉以王事浚民肌髓閭戶嗷嗷盜風益熾豈諸公視興荒齎哉由下情不易達耳今者天憫民瘼而以公賜之惟是



父母之邦義非秦越而公來適當其難僕又於公非  
私交也故敢以數年不達之民情布於下執事惟執  
事其圖之

報元美書

使還得報書併示近體讀之無一今人語以足下才  
雄視千古又得索居冥討惟意所命化工爲役亡論  
宗梁先化子與結舌卽歷下生僅僅相持如國倫者  
竊欲不自量難矣然雖揭干抱牘每飯未忘北山愚  
公東海夸父其志如是豈元美所不諒乎敬美瑰奇  
昔嘗畏之今覩所作日益凌厲張茂先之稱二陸曰

如龍躍雲津足下兄弟實似之敬美則自以爲得歷  
下生一言相印可解將謂長公何至欲與明卿並驅  
中原敬美之志則大矣余將執鞭以俟乃其紅顏棄  
傳適意尊鱸奉母從兄終身訢然則吾黨諸兄弟不  
及也昨嘗移書勸駕不知敬美謂何子和集序已先  
入梓如所評騭子相得無欲奮臂嚙舌於地下乎卽  
又何可易也樵陽介羣盜之中而禍未及境似非有  
人力所最苦者督府無時調發兵餉難乎卒應耳戎  
馬之隙再遣健兒持不腆起居太夫人惟足下亮察

復元美書

入夏還樵陽得足下一書四詩讀之海立山移不辨  
吳越潸然揮涕念當如何尚記足下詩云亦知終鼎  
俎辛苦爲誰肥又書嘗恨不能礪白刃而剗權姦之  
腹嗟乎豈惟足下有是心鄙人負國士之報蓋每飯  
未忘也乃今鼎俎旣明無煩手刃而噍類魚肉膾炙  
徹明斯不足以報地下萬一哉吳人每言足下茶志  
哀傷更踰古昔益令人心寒吳生來知起居殊備鄙  
人近理存歿諸故人手帖稍稍成帙每一過一淚至  
尊君老師一帙則每過數淚不止人世飄忽誰俟河  
清耿耿微衷欲有所藉不泯耳足下又言讀佛書快

悟冥漠將能斷割一切世界顧於海內弟兄遂比之  
恒河沙耶抑猶招之俱上乘也

報張叔大學士書

自梁園辱報書廣以神理佩之迷穀仰而思之蓋卜  
務之冥契而孫向之所爲善藏也國倫不敏感此微  
言殆若天牖然懼智習難化敬怠無恒則竭吾才或  
足以滋過而克其所操又不能以致遠請事三年迄  
無所就安得容與於冲和之堂而日聞昭曠之旨乎  
邇且爲閩吏所事事除戎計餉薰膏其心問俗察眉  
卽又鮮克有濟其四境未及于禍則天幸也政府載

清帝力易暢所需以守四方漸多文武士杞人之愚  
安足破乎計閣下入相在即當復修伊傅周召之業  
建橐揭羽海不揚波而杞人者又無所用其愚矣海  
隅望京直在天上故人末照豈其遐遺

答敬美書

吳生持足下書來相念獨至又讀贈山人三絕句冷  
然有深湛之思足下遂與長公相難兩驥二龍無奇  
矣鄙人奔走未有息踵尚負登堂酌墓之期矢此風  
心卽非宿草可陳耳今寄足下二絕幸覽見其區區  
古人有九世復讎三年報怨者足下兄弟親於近事

則薪膽可舒比聞咸陽市中人人爭啖其肉又何假手刀之乎歲時酹祭其以鄙人之言先報地下可也遠馳一力起居太夫人併問足下兄弟無恙

報易興化書

執事以一旅寄命新復孤城落寞之懷人所共諒至於解腥穢而調瘡痍使士女綏靜燧燧不再舉則已不免勞餘力乃一二祗禍不悔如賊含沙向人所謂難之尤難者也然爲之三年有成天下事無復可以難執事者矣僕株守山郡雖抱積薪之憂然視執事經營力易數倍顧竟無尺寸可補於上下古人縱步

羊腸側足周道倚伏固非所測而脩人俟天學者居以爲不易也執事何以教僕乎部使間以海岸爲言執事宜先其所急以塞羣望餘可次第舉也如何

再報易興化書

以公處煨燼之地而撫此瘡痍餘民一年以來漸有生色而又嬰城却寇以其餘力解仙遊之危此雖人謀亦天意相孤忠也大難旣平殷憂稍釋轉禍爲福因敗爲勞非公孰當之聞尊體欠安恐亦焦勞大過且不遠復矣旅中無可慰藉幸善加餐邇者香寮之賊烽望邵境日夜虞其豕突業已稱兵境上已得一

間諜訊之果云賊計將由邵入江以敗於永安又聞邵稍有備遂不果西耳廿日後此曹報已殄絕未及解嚴賤體已病山中之懷知公非欺我然以楚人爲閩吏則此口無從啓耳

寄袁松江公孺書

得太倉所寓書知賢勞雲間已卽真握雲間符矣以我兄弟閱十五六年得刺一郡視諸少年疾足過者數輩然而甘之無論大兄奇節鉅才非弟所望卽弟操弩末之力猶足以備任使未敢多讓於諸少年蓋誠欲安輪於羊腸而正色於虎尾過此以往恒難其



如予何雲間佳麗大非故昔父老借寇君相簡賢知  
大兄非負其所舉者竊在下風敬俟嘉譽乃若閭吏  
不能以一日釋其戎衣則大兄所必憐也奈何

與林繼暉郎中書

往歲入建州已知仁兄離憂遘難極爲酸辛比旣不  
能匍匐叩慰而所聞寄寓延福之境消息難真失致  
訊言無可解罪矣邇得延使寓書亦未明示所安悵  
焉東望腸如縷割方君敬歸自三山始知兄亦淹留  
三山間無他適也海氛未靜山孽易萌近者苦兵遠  
亦困餉無論守吏蓐食露寢不足言勞乃察庶眉家

泣戶歎愚民思亂智士憂生象至著矣弟以弩末之力嬰此累卵孤城日夜戒心容鬢爲老幾時得對仁兄寫此鬱鬱及請所爲善後計乎卽兄之念弟當亦無不至矣

報丘光祿書

夜別紫雲溪上歸卽成贈詩厥明書一扇追之則鵲飛遠矣已得鐔州榕城書知徒御尚爲寇阻入春方得修其牆屋居焉所謂餘生白刃親固不識耶此中屬山寇再警四月始解嚴久失起居痕若創痍前約當有吳越之遊取道過此久之不至得無爲十口羈

耶

與包護軍書

千里一士猶曰比肩十年神交賢乎尚友又遠矣鄧先生天下士也不腆敝邑辱先生儼然見客豈僕無聞尚可與言殆天憫其愚而以先生賜之耳洽夕深語承伏知新殊恨相見晚也今者掃除齋閣敢修蓋公徐孺子之禮謹事先生以求幸教併以犬子抱經託之先生豈無意乎願將軍先爲道忱款僕當躬執鞭弭以請也

報俞仲蔚書

僕於仲蔚神交十五年矣曾未有杵臼之遇而殷勤尺牘聲若平生東方曼倩有言同類之遊不以遠近爲新故吾兩人者非與往擬仲蔚詩於禎卿卽元美不以爲謬書來遜避太過豈禎卿遂絕響耶至謂元美時過禎卿則又何知言也仲蔚託跡蓬蒿棲志玄漠抗夷婁之節而抽屈宋揚馬之思才本兼人境復無累又與王郎密邇倡和不孤語出驚人宜矣宜矣顧僕敝屣未遺塵車自杞操翰於葦食露寢之隙而欲與仲蔚爭奇並麗不已難乎卽他日與仲蔚有偶於元美又安知元美不以縫掖加二千石乎山川阻

邈我思悠悠偶附吳生爲訊者如此詩二章並往焉  
與熊紹慶書

數年積悰萬里一破窮途奇遇造物有深意焉居常  
聞羅浮爲南海大觀今且閣閣烽燧中豺虎據塗無  
從飛躡廼端州七星巖跋地撐天玲瓏怪絕又以我  
故人爲之主則老吏投荒踰端州而西也豈偶然哉  
雷雨夜歸幾爲泥鮒主客高興誰其嗣之方擬詠一  
長歌小發幽趣執筆無狀又似爲山靈所禱抵郡後  
則山海之孽二面牽制每從蓐食露寢中憶與故人  
銜杯泛艇時猶隔世也又坐署中十口呻病旅況益

惡屢逢郵使不及致一言山中大舉酋首尚遺流毒  
未靖隱禍彌切此兩郡所共隱也故人何以策之

與馬叅將書

大率嶺西濱海地方兵多不習水戰賊船未泊時宜  
先行清野之法使賊登岸一無所掠而勢又不敢離  
船大遠我兵大營與賊艘相望可一二十里時出小  
隊挑戰彼卽退遁無疑不遁則我兵以靜制動必勝  
亦無疑若賊以小艇載數人以餌我而我兵貪之未  
有不墮其計者然此特可爲邀擊計捍地方一時之  
患耳至欲取全勝樹大功必非巨艦水戰不可水戰

無具雖有萬衆無能爲鄙人上狀軍府請發巨艦業已數月竟無隻櫓西來祇爲畫餅奈何頃見麾下爲山海增兵之議具悉忠謀又聞久負輜鈴此來必爲嶺西福鄙人前所陳得無以爲書生之談乎同心共濟適在此時不敢不罄其愚耳

報李中丞書

國倫束髮操薄技以從長者游蓋已知明公羽儀南海冠冕中朝矣釋褐以來轉徙江湖二十年卒未有遇間者懷牒荒裔取道羊城始得一登大雅堂望見明公顏色挹之若幽蘭叢桂叩之若大呂九鼎見踰

所聞知先於面十年夢寐須臾一醒顧以塵鞅驅馳  
不及繼見比至調所則山海巨誓日從烽燧中稍稍  
修戎事民不遑農功難掩罪意氣都盡鉛槧浸疎坐  
是久缺起居違其初心甚也遠辱問訊示以見懷高  
篇匪徒託交忘年抑欲采風下里鄙人何幸冒茲寵  
靈使還先此寓謝扇頭一詩聊以答貺非敢自附於  
同聲也

報徐子與書

次潯陽屬一書友人計仙舟入境時可達也高州之  
行強顏爲甚且不得延佇旌節意甚恨之此中喪亂



無象頗費經營卽數月小有成勞顛毛種種矣方以  
不得足下一耗爲望而吳生遠自浙來手授書翰論  
慰敦至見寄三作字句苦心而讀者心更苦也吳生  
居郡齋一月日覩蕭條踰於蓬處卽負其來意想亦  
不忍見罪抱子消息幾時可聞三男以足下遠底無  
恙工良義業稍通行當受知足下非敢私薦其子也  
歸計未決田園荒蕪俱不敢以累足下

與樹德書

奉所寄清江書知感厚念已在羊城見使者不復得  
致一語知使者亦能歸爲俗吏狀高州遠在裔海之

西蓋盜窟也坐府視事十兵而一民稍修安攘之政  
髮爲盡白他日見故人先故人老矣

與莊則勸書

別週三辰相念如一日手書兩及旣示僕以寬嚴相  
濟而又爲吾兒訂頑寓目省心真同古道敬謝僕之  
自廣入高也得請司馬以行途無它警暨視郡事則  
十寇而一兵耳旋召瘡痍之衆慰以薄恩鼓以大義  
以其三負戈矛七歸耒耜數月稍稍轉弱爲強山海  
間遂有數捷俘馘之功且踰三百會熊中丞新破曾  
曾而其餘黨千餘奔泊高境僕遣一檄諭令爲我滅

非其類盡赦其類而撫之得生活千餘人又歸被虜  
士民四百餘人業已上其事軍府矣守吏保境非敢  
言勞然皆自兄教之且春間悔出今得藉手以補過  
故不欲爲兄隱也戎務倥偬道路險遠久無歸書兄  
所必諒邸中薪俸業已移助軍興邇來但飲高涼一  
掬水諸親友殊無一絲脩敬不亦可詫乎其不詫者  
惟兄也舉目萬里悵然悵然

與莊則勸書

文從未來乃心隨兩書萬里矣又尊人在堂遠遊非  
便弟豈不諒耶書中憐弟家難其詞甚惻非弟所敢

承夫第本無家而有家今化而爲無尚愧不能復其  
初也安能顧無益之墮甌而挽已逝之頽波乎至於  
斬關之盜來去自如則可爲一方過計耳